

# Titoman Pablo Cartacushan

Cayta Pablom chalapacü-masin Titoman cartacun. Cay Tito mana-Israel cashtam cala. Paymi Siria-lädu Antioquia malcachu Pablo allin willacuypi willacuptin Jesusninchicman chalapacula. Paymi Pablocta allin willacuychu puliptin yanapala. Chaynu Creta malcachu willaculcaptinmi achca nunacuna Jesusman chalapaculcala. Chaymi Pablo chay Creta malcaman Titocta caçhaycöla, cäninman-cama tuquicta çhulaycul caminaycunanpä. Chaychu Tito cayaptinmi Pablo cay cartacta isquirbin: chalapacücunäta caminaycöca imanuy caycälinanpäpis, chaynütac malcap mandänincunaman Tayta Dios munañhannuy sujítaculcänanpäpis.

**1** <sup>1-2</sup>Diospa nunan Jesusninchicpa jucnin puydi caçhan ya'a Pablom anman isquirbiycamuc. Paymi caçhamäla aclashancunäta payman chalapacachinapä, jinaman allin cawsayta wayuycachi willacuyta yaçhaycachinapäpis. Cay rasuncämari wiñay cawsayta alcaycachin manalä imapis captin Dios limalicushanmannuy. Pay'a manamá articunchu. <sup>3</sup>Chalapacuna captimá, Salbacü Diosninchic unanchashan timpuçu "Caymi lulanayqui" nil allin willacuyta camalaycachinapä caçhamäla.

<sup>4</sup>Chaymari sumä chalapacü-masí Tito walañní canan isquirbimuc. Quiquin Tayta Diosninchicwan Duyñunchic Salbacü Jesuspa llaquipayninpita jawca cawsay améchu caycuchun.

## Caminaycünaca imanuy capäcunanpäpis

<sup>5</sup>Chay Creta malcachu caçhaycamulac allichaypä cäcunäta cäninman-cama çhulalpunayquipämi, chaynütac nishämannuy chalapacücunäpä puydi caminaycünincunactapis malcan-malcan çhulaycunayquipämi. <sup>6</sup>Cay caminaycöca canman: imapi mayanpis mana jamuyaycunallanpis cämi, juc walmiyüllam, chulincunapis chalapacü-camam, jinaman munañhançu pulicüpä nï pasaypi cullucamapä uchuyllactapis licaycälinmanchu. <sup>7</sup>Cay caminaycöca Tayta Diosninchicpa lulaynincunacta licaycöca calmi allin tincüninman cawsaycunman mana mayanpis jamuyänanpä: mana nunatucüshalla, imallapäpis mana piñacullal, mana shincacullal, pilyallacta

mana ashiyal, nitac juyucunallawan gänaypi mana wañupacuyalcalpis. <sup>8</sup>Ashwanpam canman: wasin'chu jamaycachï, allincällapi wañupacü, allin cäninman tantiaycü, allin tincullanman lulaycü, Tayta Diosllanchicpä cawsaycü, quiquinta sujitacüpis. <sup>9</sup>Chaynütac ya'chachishan chalapacuna willacuyta shun'unman chulaycü canman, juccunactapis ya'chaycachinanpä, chaynütac cuntraçucunäwanpis sumä tincunanpä.

<sup>10</sup>Rasunpa, achcamä pasaypi cullucuna yan'al articunawan ingañacücuna cayalcan. Mastä chay Israel cašta aychanchic'chu siñalachicuypi wañuyäcunämi. <sup>11</sup>Chaycunap shiminta quillpä-nanchicmi, mana ya'chachinacuna wasintin-wasintin nunacunäta ya'chayalcächiptin'a. Caytapis illayta juluyninwanlämi lulapäcunpis. <sup>12</sup>Caycunapi quiquin Creta malcapi willacüninpis malca-masincunapita nila: "Creta nunacuna casquish-camam, chucaru uywacunanümi, micuyllapi wañupacuyalcä illacunam" nil. <sup>13-14</sup>Cay nishanca rasunpam. Chaymi chay yan'al ya'chachicücunäta sumäta anyanayqui, chalapacuynin'chu allin cananpä chaynütac allincäta ipanchä Israelcuna yan'al apayca'cha'shan cuintuncunacta camachicuy-nincunacta mana cäsuculcänanpä. <sup>15</sup>Ñatac allin shun'uyu allin pinsayniyücäpä imapis allinmi. Pasaypi shun'uyu mana chalapacücunäpäñatacmi ichä imapis mana allinlla, ašta pinsayninpis, pasaypi anla shun'uyüllañam cayan. <sup>16</sup>"Diosllawanmi cayä" nipäcuptinpis, lulaynincunañatacmi ichä mana tincunchu. Chay pasaypi cullucama, çhinisha-cama, allincäta uchuyllactapis mana lulaycuyta atipä-camam.

### Lluypäpis limapaycuynin

**2** <sup>1</sup>Amñatac ichä allin ya'chachicuymanu ya'chaycachiy. <sup>2</sup>Ya'sha wayapacunaca capäcunman: cäninman limacü-camam, rispitchicü-camam, tantiayniyü-camam, chaynütac chalapacuynin'chüpis cuyacuynin'chüpis pasinsiaynin'chüpis masisu tacyaycälimi.

<sup>3</sup>Chaynütac ya'sha walmicunäpis capäcunman: Diosllapä sumä cawsaycü-camam, mana wa'sha limacü-camam, mana upyayta pulicü-camam, a'shwanpa allincäta ya'chachicü-camam. <sup>4</sup>Chaymi lasac walmicunätapis wayapantawan wawincunacta cuyayta ya'chaycachinan. <sup>5</sup>Chaynütacmi allin pinsayniyu cayta, allin chuya shun'uyu cayta, wasinta sumäpa licaycuyta, alli nuna cayta, wayapanman sujitacuyta ya'chaycachinan. Chay'cha Tayta Diospa allin willacuyninta mayanpis mana jamuyänan can'achu.

<sup>6</sup>Chaynütac müsucunätapis limapaycuy allin tantiay-sapa sumäpa cawsapäcunanpä. <sup>7</sup>Am'a lluy ima'chüpis sumä allin licachipäri caycuy. Ya'chachilpis tincullanman rasuncällacta sumäpa ya'chaycachiy.

<sup>8</sup>Imam cäcällactatac willacuy; chaycha chhnicucunaca uyshulapacul imallactapis mana nipäcushunayqui can'achu.

<sup>9</sup>Llapa uyway nunacunätapis limapaycuy, patrunninta cäsuculcänanpä, shun'unpänuy caycälinanpä, ñatac mana shimi-sapa capäcunanpäpis. <sup>10</sup>Amatac patrunnincunap imantapis chalayapuchunchu, ashwanpa chalapacuna capäcuchun. Chaycha Salbaycamäninchic Tayta Diospa yachhichuyninta sumä-sumä tuquicta waytaycälíchina.

<sup>11</sup>Tayta Diosninchicmari llaquipayninta camalaycachin jinantin pachächu nunacunäta salbaycunanpä. <sup>12</sup>Llaquipayninmari cay pachächu mana allincunäpi wanachimanchic. Jinaman'a mana allincälla cayä pachächümi allin tantiaywan, Tayta Diosllap munayllanču cawsachimanchic. <sup>13</sup>Jinašhancamam sumä wañupacushhanchicta cushisha alcanchic: sumä Dios Salbamäninchic Jesuspa sumä cutimuyntamá. <sup>14</sup>Paymi ya'anchic-laycu wañuycäman quiquin ucula llapa mana allincäpi juluycul quiquinpa chuya malcanña cananchicpä, jinal allincällacta lulaypi wañupacuyalcänanpä.

<sup>15</sup>Chayurá caycunacta yachhichinayquipäpis callpanchanayquipäpis, anyanayquipäpis cäsucanmi. Ama-ari mayanwanpis jamuyächicuyaychu.

### Allincäta lluymi lulayta jicutaycunan

**3** <sup>1</sup>Chaynütac yalpachinqui malcap prinsipal puydinincunaman, mandänincunaman sujitaculcänanpä, cäsuculcänanpä, allincällacta lulä-cama listu capäcunanpäpis. <sup>2</sup>Jinaman mayanpa washantapis amatac limapäcuchunchu, ni pilyallactapis ashipäcuchunchu. Ashwanpa mana nunatucullal cuyacü-cama lluywanpis capäcuchun.

<sup>3</sup>Ñatac puntactá ya'anchicpis mana tantiayniyu, mana cäsucuyniyu, pasaypi cullu-cama, pantäsham cawsalanchic. Chaynütac imaymana mana allin anla munaycunaca maquinču chänalächimälanchic. Chaynütacmi mana allincällaču, läga cayllaču, chhnicushtin chaynütac chhinisha lluyppapis cawsalanchic. <sup>4-5</sup>Jinaptinchicpis Salbamäninchic Tayta Dios llaquipaynintawan cuyacuyninta chhaychamaptinchicmi salbaycamälanchic. Manam allinta lulašhanchicpachu, sinu'a llaquipayllanpam. Cay Tayta Diosmi Chuya Ispiritup munayninwan shun'unchieta pa'aycul mušhüpi näsichimälanchic, mušhü cawsayta uycamänanchicpä. <sup>6-7</sup>Salbamäninchic Jesuspam Chuya Ispirituntapis juntay-juntay llimpay-llimpayta<sup>a</sup> uycamanchic limalicamäshhanchic wiñay cawsaycäta alcananchicpä.

<sup>a</sup>3.6-7 *llimpay-llimpay* Waquincunachu'a "llüllay-llüllayta" nipäcunmi.

Cayman chalapacunchic Tayta Dios llaquipayninchu ya'anchicwan caşhan allinpa licaycamášhanchicpam. <sup>8</sup>Cay'a chalapacunam. Chaymi chalapacü-masinchiccunacta sumäpa jicutaycunayqui, lluypäpis allinninpa cä lulaycäta lulaycälinanpä.

<sup>9</sup>Ñatac awquillucunapi luclu ruyduycunapita, Moisespa camachicuyninpi yan'al tapunacuycunapitapis japächaculcay. Chaycuná mana cäpä yan'alpämari. <sup>10</sup>Chaymi mayanpis laquinacachiyta lulaptin'a ishca cuticamalla anyapaycuy. Chaychu mana uyalitucuptin'a alüläli. <sup>11</sup>Chay nunaca uman muyüshaña chapunacuyapinmi quiquinpa juchallan cäraycun.

### Camacalpunanpä limaycun

<sup>12</sup>Ñatac Artemasta ütac Tiquicocta anman caçhamupti-pacha, Nicapolis malcaman imanuyppapis pasamunquiman. Chaychümi tamya timpu caşhancama cayta munayá. <sup>13</sup>Ñatac Apolostawan tintirillu tayta Zenasta, lluy atipášhayquiçu yanapaycuy, biäjinchu imapis mana pishiycunanpä. <sup>14</sup>Llapa chalapacü-masinchiccuna allincäta lulayta yaçhapäcuchun pishipacücunätapis yanapaycunanpä, jinaman wayuy-sapa-cama caycälinanpäpis.

<sup>15</sup>Ya'awan lluy cäcunämi limaycälimuşhunqui. Chaynütac cuyapämä chalapacü-masinchiccunacta limaycäli. Quiquin Taytanchicpa llaquipaynin amcunawan caycuchun. Chaynu cachun.